



瑜伽集要焰口施食起教阿難陀緣由  
瑜伽集要焰口施食儀

唐 三藏沙門不空奉詔譯

瑜伽集要焰口施食起教阿難陀緣由、瑜伽集要焰口施食儀



清刻龍藏佛說法變相圖

瑜伽集要焰口施食起教阿難陀緣由漆十  
唐 三藏 沙門 不空 奉詔譯

爾時世尊在迦毗羅城尼俱律那僧伽藍所  
與諸比丘并諸菩薩無數眾會前後圍遶而  
為說法爾時阿難獨居靜處念所受法即於  
其夜三更已後見一餓鬼名曰焰口其形醜  
陋身體枯瘦口中火然咽如針鋒頭髮鬢亂  
牙爪長利甚可怖畏住阿難前白阿難言汝  
却後三日命將欲盡即便生於餓鬼之中是  
時阿難聞此語已心生惶怖問餓鬼言大士  
若我死後生餓鬼者我今行何方便得免斯  
苦爾時餓鬼白阿難言汝於來日晨朝若能  
布施百千那由他恒河沙數餓鬼飲食并餘  
無量婆羅門仙閻羅所司業道冥官及諸鬼  
神先亡父遠等所食飲食如摩伽陀國所用

之斛各施七七斛飲食并為我等供養三寶  
汝得增壽令我等輩離餓鬼苦得生天上阿  
難見此焰口餓鬼身形羸瘦枯焦極醜口中  
火然其咽如針頭髮鬢亂毛爪長利又聞是  
語甚大驚怖身毛皆豎即至晨朝從座而起  
往詣佛所右遶三匝頂禮佛足身體戰慄而  
白佛言大悲世尊願救我苦所以者何昨夜  
三更經行靜處念所受法見焰口鬼而語我  
言汝過三日必當命盡生餓鬼中我問鬼言  
云何令我得免斯苦餓鬼答言汝若能施百  
千那由他恒河沙數無量餓鬼婆羅門仙闍  
羅所司業道冥官及諸鬼神侍從眷屬先亡  
久遠平等普施餓鬼飲食汝得增壽白言世  
尊云何能辦無量飲食充足佛告阿難汝今  
勿怖我念過去無量劫中曾作婆羅門時於

觀世音菩薩摩訶薩邊受得陀羅尼名曰無  
量威德自在光明如來陀羅尼法佛告阿難  
汝若善能作此陀羅尼法加持七遍能令一  
食變成種種甘露飲食即能充足百千俱胝  
那由他恒河沙數一切餓鬼婆羅門仙異類  
鬼神上妙飲食皆得飽滿如是等眾一一各  
得摩伽陀國所用之斛此食此水量同法界  
食之無盡皆獲聖果解脫苦身佛告阿難汝  
今受持此陀羅尼法令汝福德壽命增長餓  
鬼生天及生淨土受人天身能令施主轉障  
消災延年益壽現招勝福當證菩提發廣大  
心普為有情積劫已來多生父母列宿天曹  
幽司地府焰魔鬼界蜚微蠢動一切含靈普  
設無遮廣大供養悉來赴會承佛威光洗滌  
身田獲斯勝利受人天樂唯願諸佛般若菩

薩金剛天等及諸業道無量聖賢以無緣慈證我所行是故我等為欲滿足宏誓願故為欲宏護令濟有情無退失故為摧諸業令清淨故為欲精進求無上道速成就故為欲拔濟惡道眾生永拋苦海登彼岸故如經所說無邊世界六道四生其中所有為於主宰統領上首之者皆是住不思議解脫菩薩慈悲誓願分形布影示現化身在六道中同類受苦設於方便不被煩惱隨煩惱壞分別諸業令發道意常自克責悔身造作調伏教化一切眾生為大導師摧滅三塗淨諸業道三斷截愛流不捨行願處於苦海為善知識成熟利樂一切有情證大涅槃若有施主深信大乘渴仰瑜伽願樂見聞陀羅尼藏甘露法門為諸有情興拔濟心慇懃稱讚捨大財寶三請

於師方許壇法平等一如離怨憎想常行布施無有悔恨親近善友勇猛精進無有怯弱至求大道稱讚三寶撫育生命方便拔濟皆令解脫不以惡求而養身命常自利他彼善男子是真善友行菩薩行普為三塗諸惡趣中一切餓鬼焰魔王等婆羅門仙虛空諸天釋梵四王列宿天曹龍神八部日月須彌脩羅外道六欲魔眾水火風空山林窟穴舍宅宮殿伽藍大地江河流泉浴池廟宇吉凶遊行神眾抄錄善惡神通無礙羽毛飛空水族遊鱗披毛角類蠢動含靈曠野遊覓鞭尸苦澁多生冤恨相繫未免歷劫冤負於財命亡過僧尼未證果者多生父母眷屬親戚承如來教得出三塗無量地獄發菩提心各願放捨解脫冤結遍相讚念如父母想到此道

塲證知護念心懷踊躍如優曇花甚難可值  
由自造作處於人間識情難定多隨妄起積  
為苦源未獲聖果旋生過患又復依王水土  
住佛慈光常思曩緣猶懷今果日夜克責何  
報如斯或為眷屬親戚父母幾曾翻覆顛倒  
攀緣改形換面豈將辯識惟願今日承斯佛  
力駕迥飛空到此道塲慈光拂體各隨形類  
懺滌塵尤發菩提心納斯供養佛告阿難若  
欲受持施食之法須依瑜伽甚深三昧阿闍  
黎法若樂修行者應從瑜伽阿闍黎學發無  
上大菩提心受三昧戒入大曼拏囉得灌頂  
者然許受之受大毘盧遮那如來五智灌頂  
紹阿闍黎位方可傳教也若不爾者迥不相  
許設爾修行自招殃咎成盜法罪終無功效  
若受灌頂依於師教修習瑜伽威儀法式善

能分別了達法相故名三藏阿闍黎方得傳  
斯教也若欲作法先自護持弟子亦爾定知  
日已選擇淨地精華大舍閑靜園林鬼神愛  
樂流泉浴池江海山澤福德之地堂舍亦得  
如法塗摩用香水泥隨施主力方圓大小四  
角豎標如法莊嚴用五色綵安火焰珠又於  
珠內安置佛頂大悲隨求尊勝東北佛頂東  
南大悲西南隨求西北尊勝又於四柱如法  
莊嚴殊特妙好名吉祥幢令百由旬無諸衰  
患即成結界風吹影拂土撒水霑罪障消亡  
獲大福利眼見耳聞普皆利濟次復周圍懸  
繒幡蓋寶扇白拂布列位次阿伽香水妙花  
燈塗飲食湯藥種種果味及餘物等以法淨  
除勿令觸穢莊嚴若了手執香爐右遶道場  
遍以觀照不周備處重要安排莊嚴事畢與

本十

四

本十

五

諸弟子香湯洗浴著新淨衣出外中庭如法  
洒掃香泥塗地如法莊嚴名三昧耶壇於道  
場外敷淨薦褥嚴整威儀作禮三拜面東胡  
跪手執香爐作啓請法  
瑜伽集要焰口施食起教阿難陀緣由竟